

Dumonda Pfäffli concernent la garanzia da la protecziun da la populaziun e da las infrastructuras criticas dal chantun Grischun en cas d'ina situaziun extraordinaria en Svizra

En il chantun Grischun datti uschenumnadas «infrastructuras criticas» d'importanza naziunala e regiunala (p.ex. las transversalas da las Alps sin via e da la viafier, stabiliments per producir e per transmetter energia electrica, indrizz da communicaziun, manaschis industrials pli gronds, stabiliments militars, accumulaziuns considerablas da personas, centers da regulaziun e da direcziun e.u.v.). En il cas normal èn las forzas chantunals prontas da tut temp da garantir la segirezza. En cas d'ina situaziun extraordinaria en Svizra, sco moviments da migraziun pli gronds e nunspegts, activitads terroristicas u in conflict armà en l'Europa, na pon las forzas betg bastar. D'utilisar contingents dals chantuns da concordat fiss illusoric en quest cas, e l'armada svizra ch'è vegnida smesada e restructurada danovamain dapi il 1. da schaner 2018 pudess dar sustegn mo en ina dimensiun fitg restrensida. Il quità crescha che la segirezza publica na pudess betg vegnir garantida en cas che la situaziun en Svizra sa pegiurass considerablamain.

En quest connex vegn la regenza supplitgada da responder las suandantas dumondas:

1. Disponan las autoritads grischunas d'in inventari actual da las «infrastructuras criticas» da tut las categorias ed ha il chantun ina survista davart las analisas da las ristgas ch'ils gestiunaris han fatg per las «infrastructuras criticas» sco er davart las mesiras deducidas da quellas per la segirezza er per la gestiun dals stabiliments en cas d'ina situaziun extraordinaria en Svizra?
2. Quants dals objects ch'èn classifitgads sco «degns da vegnir protegids» pudessan vegnir protegids er durant in temp pli lung d'almain in'emna efficaciamain cunter donns, cunter sabotascha u cunter destrucziun?
3. È la regenza pronta da pretender da la confederaziun da furnir las prestaziuns previsas che l'armada sto ademplir tenor la constituziun a favur dal chantun Grischun e da persequitar l'uschenumnà ulteriur svilup da l'armada en moda critica or da questa perspectiva?

Cuira, ils 12 da favrer 2019

Pfäffli, Crameri, Salis, Aebli, Alig, Berweger, Bigliel, Bondolfi, Brunold, Caluori, Cavegn, Caviezel (Cuira), Caviezel (Tavau Clavadel), Claus, Della Cà, Derungs, Dürler, Ellemunter, Engler, Fasani, Felix, Flütsch, Föhn, Gasser, Geisseler, Giacomelli, Hartmann-Conrad, Hefti, Hitz-Rusch, Hohl, Holzinger-Loretz, Jenny, Kasper, Kienz, Kohler, Kunz (Fläsch), Kunz (Cuira), Kuoni, Lamprecht, Marti, Michael (Donat), Michael (Castasegna), Mittner, Müller (Susch), Niggli (Samedan), Noi-Togni, Rüegg, Schneider, Schutz, Stiffler, Tanner, Thomann-Frank, Thür-Suter, von Ballmoos, Waidacher, Weidmann, Wellig, Widmer-Spreiter (Cuira), Wieland, Zanetti (Sent), Collenberg, Holliger, Lunghi, Ulber Daniel